

الأنبياء الكبار

دانيال

رجاء يثبت الإيمان حتى في أصعب الظروف

سفر جميل جداً بيقدم لنا قديسين ثابتين في ربنا رغم الصعوبات والضيق، وإزاي ربنا بيخلصهم ... و نبوات عن انتصار ربنا على الشر اللي في العالم مهما زاد

ليه ندرس عهد قديم؟

"فتشوا الكتب لأنكم تظنون أن لكم فيها حياة أبدية. وهي التي تشهد لي"

وصية واضحة من ربنا لدراسة العهد القديم (تلتين الكتاب المقدس) ...

1. مانقدرش نستوعب العهد الجديد صح غير من خلال نبوات و أحداث العهد القديم
2. ربنا هو هو أمس و اليوم ... و كذلك الإنسان ... العهد القديم غني جداً في شرح معاملات ربنا مع الإنسان بطريقة تخلينا نفهم ربنا
3. الكلام ده اكتب عشاننا (الوعود و الوصايا لا تتغير) ... ربنا كمل لنا (لم آت لأنقض بل لأكمل)



i عن السفر



عدد الإصحاحات: 14 إصحاح منهم 2 و نصف من تتمة دانيال (الأسفار القانونية الثانية)

ظروف الكتابة: ?

- دانيال كان من **السبي الأول من أورشليم لبابل** عن طريق نبوخذنصر الملك (السبي حصل على 3 مرّات، انتهت الثالثة بتدمير المدينة تماماً) لها أخذ كنوز البلد و سبي أشرافها (ملوك الثاني 24) ... ده كان وقت إرميا النبي الذي تنبأ إن السبي هيطول لمدة 70 سنة وقال للمسبيين إنهم يعيشوا في بابل الفترة دي بدون مقاومة
- سبي الشرفاء ده تحقيق لنبوذة إشعيا لحزقيا الملك (إشعيا 39 : 6 و 7) ... **دانيال و ال3 فتية كانوا من العائلة الملكية**
- **ما أحزن هؤلاء الشرفاء** و هم يوّدعون أورشليم (أرض الموعد) إلى أرض الكلدانيين اللي تركها جدّهم أبونا إبراهيم من 14 قرن
- قليلين فهموا إن ده **تأديب من أب محب عايز ولاده يتوبوا** و يرجعوا له ... منهم دانيال و ال3 فتية اللي قرّروا يتمسّكوا بالله
- دانيال استمر في بابل **70 سنة** (حضر العودة من السبي بعد ملك مادي و فارس)، من 605 لحد 535 ق.م.

📌 هدف السفر:

- **يعلّمنا الاختيار** ... دانيال كان عنده اختيارين: باب واسع و باب ضيق ... هو اختار الضيق (زي يوسف الصديق) ... نفس الكلام: ال3 فتية كان عندهم اختبار سهل هو السجود لتمثال الملك لكن اختاروا الباب الضيق (السجود لله وحده حتى لو المصير هو الإلقاء في آتون النار) ... إحنا لو مكانهم كُنا هتختار إيه؟
- **بيفهمنا إن الله هو ضابط التاريخ كله** و يتمجّد في القلّة القليلة المتمسّكة به حتى لو فيه ممالك متكبرّة و بعيدة عن ربنا
- **بيعلّمنا إن الصداقة مع الله و الحفاظ على وصاياه ممكنة حتى في الغربّة**
- **يسرّ الرب لخائفه** ... ربنا بيقول لولاده على اللي هيحصل (زي ما قال لإبراهيم و إشعيا و إرميا قال لدانيال عن مجيء المسيح و بعض النبوات عن المستقبل القريب للعالم و عن نهاية الأزمنة)
- **كل واحد فينا له دور** يتمجّد به اسم ربنا حتى لو في الغربّة ... دانيال و ال3 فتية على أيديهم آمن الملك نبوخذنصر بقوة الله

📌 مفاتيح فهم السفر:

- دانيال بس من شخصيات الكتاب هو اللي كان لقبه **(الرجل المحبوب)**
- دانيال معناها **الله ديان** ... ماشية مع السفر اللي بيحكى عن الله ضابط الكل الحاكم العادل



تقسيم السفر: جزء تاريخي (إصحاح 1 ل 6) و جزء نبوي (إصحاح 7 ل 12) ... إصحاح 13 (تنمة دانيال 2) تحكي قصة سوسنة العفيفة التي نقرأها في سبت النور و إنقاذ دانيال لها، و إصحاح 14 (تنمة دانيال 3) يحكي قصص بطولية لدانيال بـثبت فيها بـطلان عبادة الأوثان ... و النتيجة (دخول جـب الأسود ثاني ... و الخروج حي ثاني)
الإصحاحات من 2 ل 7 مكتوبين بالآرامي ... باقي الإصحاحات بالعبري

إصحاح 1

تحدي في الغربه

رغم الغربه و الأوضاع التي فُرِضت عليهم ... قدر دانيال و الـ3 فتية يكسبوا (تحدي في الغربه) رغم إنه مستحيل و يحافظوا على عهدهم مع الله

إصحاح 2

حلم نبوخذنصر الأول: مستقبل الممالك

الله يكلم الملك نبوخذنصر بحلم عشان يعرّفه مستقبل 4 ممالك (بابل و فارس و اليونان و الرومان)

إصحاح 3

الفتية الـ3 في الآتون

أروع ملحمة: الـ3 فتية يدخلون آتون النار و يأتي المسيح لهم و يخرجوا سالمين

إصحاح 4 و 5

ملك متكبر يتوب ... و آخر يسقط

نبوخذنصر يتعرض لتجربة صعبة تنتهي بتوبة ... بينما حفيده المتكبر لا يتوب

إصحاح 6

دانيال في جب الأسود

بسبب أمانته مع الله ... دانيال يدخل جب الأسود ... و ينجو

إصحاح 7 و 8

رؤيتين لدانيال: تعاقب الممالك

رؤيتين لدانيال بتفاصيل جديدة عن الحلم الأول لنبوخذنصر الملك (الـ4 ممالك)

إصحاح 9

صلاة دانيال و الرؤيا الثالثة

صلاة توبة رائعة لدانيال ... وبروح النبوة شاف رؤيا تالته

إصحاح 10 ل 12

الرؤيا الرابعة: الرب يسوع في مجده

آخر وأعظم نبوة شافها دانيال ... ربنا يسوع في مجده و نهاية الأيام

ملخص السفر

1: تحدّي في الغربه

إصحاح 1



- دانيال و ال3 فتية كانوا في سن إعدادي أو ثانوي (14 ل 18 سنة) ... دخلوا زي مدرسة 3 سنين عاشن يتعلموا لغة و ثقافة و حكمة بابل ... عشان بعد كده الأوائل منهم يكونوا وزراء و حكماء في بابل
- كان معروض عليهم كشباب في الغربية عروض صعب جداً يرفضوها خصوصاً لما كل الشباب قبلوها: إنهم ياكلوا أكل من مائدة الملك و يشربوا من خمره (طبعاً ده يخالف تماماً الشريعة)
- دانيال و ال3 فتية قرّروا يقبلوا التحدي الصعب ده ... حظّوا في قلبهم بتصميم و إرادة: (لن نتجنّس) ...
 - قيه تغييرات مش في إيدنا (تغيير في المكان و تغيير في اللغة و تغيير في الأسماء)
 - لكن فيه تغييرات لن نرضى بها مهما كان مصيرنا: قلبنا و فكرنا و إرادتنا و تصرّفنا
- و بعد الاتفاق ده، جه وقت الفعل: قالوا لخدّام الملك يجربوا يؤكلوهم القطاني و يشربوا الماء ... و ربنا أعطاهم نعمة و صحة، فاستمرّوا 3 سنين على النظام ده بدون أن تتأثر صحتهم
- اجتهد دانيال و ال3 فتية في التعلّم + أمانتهم مع ربنا ... ربنا أعطاهم نجاح و نعمة (10 أضعاف المجوس و الحكماء التانيين) ... و نالوا نعمة و كرامة في عين الملك لما شافهم و اتكلّم معاهم بعد ال3 سنين

نقدر نفهم أكثر في وعظة تحدي في الغربية لأستاذ عادل ألفونس

أما دانيال فجعل في قلبه أنه لا يتجنس بأطياب الملك و لا بخمر مشروبه

دانيال 1 : 8

كلمة (أما) دي مهمة جداً لأن فيه كتير من اليهود انغمسوا في الحياة الجديدة دي و نسيوا أورشليم و الله و شريعتهم


نتعلّم إيه؟

10 أيام صوم قصادهم 10 أضعاف الحكمة و الفهم ... السر مش في الفول بل في الأمانة في تنفيذ وصية ربنا

يا رب خليني أتعلم من دانيال و ال3 فتية الأمانة ... مهما كانت البيئة اللي أنا فيها صعبة، أقدر أحافظ على وصاياك لو (وضعت في قلبي) كده

2: حلم نبوخذنصر الأول: مستقبل الممالك

إصحاح 2



الإصحاح ده حصل بعد شوية سنين من الإصحاح الأول ... طبعاً السنة الثانية لملك نبوخذنصر لأنه قبلها كان بيحكم كنائب لوالده بس (وقت ما بدأ سبي دانيال و ال3 فتية)

- ربنا كلم نبوخذنصر في حلم ... الملك انزعج جداً لكن لقا صحي مافتكرش الحلم، فجمع السحرة و المجوس بتووعه يطلب منهم يقولوا له الحلم و تفسيره ... قالوا له ده مستحيل و اعترفوا بضعفهم على طول

- الملك انزعج جداً و أمر بقتل كل حكماء مملكته ... بما في ذلك دانيال و ال3 فتية، و بدأ فعلاً تنفيذ الأمر ده ... لَهَا جِه الدور على دانيال، استأذن رئيس الشرطة و دخل للملك قال له يديله أيام قليلة و هو يقول له الحلم و تفسيره ... و وافق الملك و على طول اجتمع دانيال و ال3 فتية بصوم و صلاة إن ربنا يكشف لهم الأمر
- بقوة الصلاة اللي نقلت الجبل ... دانيال و ال3 فتية صلّوا و ربنا استجاب و أعلن لدانيال الحلم و تفسيره ... و دانيال شكر ربنا و أسرع للملك يقول له يوقّف الإعدام ده ... و قبل ما يقول الحلم و تفسيره للملك، شهد لربنا الأول بمنتهى التواضع
- الحلم كان تمثال كبير جداً راسه من ذهب و صدره من فضة و فخذه من نحاس و ساقاه من حديد ... **بيمثلّ تتابع الممالك:**
 1. بابل = ذهب، رمز الغنى و الكرامة اللي أعطاهها الله لمملكة نبوخذنصر
 2. فارس = فضة، جه كورش (سنة 538 ق.م.) و انتصر على حفيد نبوخذنصر و بدأت مملكة فارس اللي ماكانتش قوية زي بابل
 3. اليونان: نحاس، الإسكندر الأكبر جمّع اليونان و انتصر على مملكة فارس سنة 331 ق.م. و بعده اتوزّع المُلك على 4 من قوّاده
 4. الرومان: خزف و حديد، انتصر الرومان على اليونان سنة 168 ق.م. و كانت مملكة قوية و قاسية ... كان ليها مستعمراتها و جالياتها في كل بلد لكن من غير ما يختلطوا بسكان البلد (كما لا يختلط الحديد بالخزف)
 5. في الآخر هاييجي ربنا يسوع (الحجر الغير مقطوع بيد) و يؤسس مملكة لن تزول إلى الأبد (كنيسة العهد الجديد)
- الملك بارك إله دانيال و خلّى دانيال رئيس وزراء ... و ال3 فتية قادة كبار في المملكة

**و الأمر الذي يطلبه الملك عَسِر، و ليس آخر يبيّنه قدام الملك غير الآلهة الذين ليست
سكناهم مع البشر**

دانيال 2 : 11

الحكمة البشرية لها حدود واضحة و نقص واضح ... و اعتراف حكماء بابل ده هو اللي خلّى نبوخذنصر في آخر الإصحاح يبارك إله دانيال

نتعلم إيه؟

قوة الصلاة بروح واحدة عشان ربنا يصنع الخلاص ... أنقذت دانيال و ال3 فتية من موت محتوم

🙏 يا رب خليني أقابل كل ضيقاتي و مشاكلي بالصلاة ... و أقول لإخواتي كمان يصلوا لي و معايا

#3: الفتية ال3 في الأتون

إصحاح 3



الفارق الزمني بين الإصحاح ده و اللي قبله كبير ... دانيال و ال3 فتية كانوا في أوائل الثلاثينات من عمرهم ... غالباً دانيال ساعتهما ماكانش في بابل عشان كده ماسمعناش عنه

- نبوخذنصر فضل يفكر في اللحم و حاول بكبرياء يتجنب سقوط مملكته بأنه حاول يوتد كل الشعوب و يخليها تعبدته هو **فعمل التمثال كله من ذهب** (التمثال كان قد عمارة 10 أديار و كله من الذهب) ... و الأمر واضح لكل أهل بابل: السجود للتمثال أو الإلقاء في آتون النار المتقدة اللي مفتوح عشان الناس تشوفه و تخاف
 - طبعاً الكل خاف و أطاع خوفاً من النار ... **إلا ال3 فتية القديسين** (اللي دلوقتي أصبحوا رجال في الثلاثينات مثلاً بس زي ما هم محافظين على أنفسهم) ... طبعاً فيه ناس غيرانة منهم و عايزة تاخذ مكانهم فقالوا للملك، اللي جابهم و هددهم و أعطاهم فرصة أخيرة لكنهم صمموا على عدم السجود لغير إلههم
 - الملك أمر بتحمية الآتون 7 أضعاف و إلقاء ال3 فتية مقيدين فيه (لدرجة إن الناس اللي رمتهم في الآتون اتحرقوا من شدة اللهب) و قعد يتفرج مستني يسمع صرخات ال3 فتية ... لكن **شاف ابن الله (ربنا يسوع) معاهم في الآتون** و بدل الصرخات انفكت قيودهم و اتمشوا في الآتون و سبّحوا الله
 - طبعاً دي أمجد و أعظم لحظة في حياة ال3 فتية ... و الملك على طول قال لهم يخرجوا من النار و أعطى المجد و الكرامة لإلههم و إن كان لسة لم يؤمن به حتى هذه اللحظة ... **خرج ال3 فتية بعد أن انحل وناقمهم و بقي ابن الله في الآتون** ... زي الصليب اللي اجتازه ربنا وحده فداءً عنا
 - و كنيسةنا الجميلة بتفكرنا بالإصحاح ده في مديحة (الله الأزلي قبل الأدهار) ... و بنشوف في تتممة دانيال (بعد آية 23 في الأسفار القانونية الأولى) الجزء الرائع بتاع صلاة عزريا اللي بنقراها في سبت النور ... صلاة كلها تواضع و ثقة في ربنا ... و بنشوف ألحان من أجمل ما يمكن في التسبحة:
1. **نتبعك بكل قلوبنا** (حزء من صلاة عزريا)
 2. الهوس الثالث (صلاة ال3 فتية لهما نزل السيد المسيح و تمشى معهم و خلّى الآتون زي الندى البارد) ... و الكنيسة من روعة الهوس الثالث ميّزت آخر جزء فيه بلحن خاص **اسمو ابتشويس و اري هوو تشاسف**
 3. بعد كده كمان في تسبحة نصف الليل لحنين: **أرييسالين و تينين**

هوذا يوجد إلهنا الذي نعبد يستطيع أن ينجينا من آتون النار المتقدة، وأن ينقذنا من يدك أيها الملك. وإلا فليكن معلوماً لك أيها الملك، أننا لا نعبد آلهتك ولا نسجد

لتمثال الذهب الذي نصبته

دانيال 3 : 17 و 18

إيمان قوي جداً و ثابت زي الجبل في موقف صعب جداً الموت بطريقة بشعة هو النتيجة الحتمية فيه ... و قصاد كده ربنا تمجد معاهم و نزل في وسطهم و نجاهم و مجدهم


نتعلم إيه؟

صلاة عزريا درس في التواضع و الرجاء و الثقة في ربنا ... فعلاً دانيال و ال3 فتية زي النجوم المضيئة في زمن كله ظلام

يا رب خليني أقتدي بال3 فتية القديسين و إيمانهم و شجاعتهم و تواضعهم و رجاءهم فيك حتى في أصعب الظروف

4: ملك متكبر يتوب ... و آخر يسقط

إصحاح 4 و 5



تكبر ينتهي بتوبة

إصحاح 4

- نبوخذنصر ساعته كان فعلاً ملك الأرض كلها و بابل كان فيها رضاء كبير جداً (زي حدائق بابل المعلقة) ... بالتالي كان عنده كبرياء ... **ربنا من رحمته كان عايز يشيل الكبرياء ده منه**
- وراه في حلم نتيجة الكبرياء: شجرة كبيرة تسقط و تُقَطَّع ... الملك قال للحكماء يفسروا الحلم ماعرفوش، **استعان بدانيال اللي فسر له الحلم و نصحه بالتوبة**
- واضح إن الملك تاب في الأول لكن بعد سنة عاد له كبرياءه ... **فتحقّق الحلم** و فضل 7 سنين مريض مثل الحيوانات ... مرض نبوخذنصر ممكن يبقى روح شرير (زي مجنون كورة الجديين) أو مرض نفسي أو عضوي
- لكن هنا بتيجي عظمة التوبة بقى ... الملك تواضع و تاب و رجع لملكه تاني و **أرسل رسالة لكل الشعوب بيحكي اللي حصل معاه و يعظم ربنا**

تكبر ينتهي بهلاك

إصحاح 5

بعد سنين كثير، مات نبوخذنصر و ملك حفيده بيلشاصر ... للأسف حفيد نبوخذنصر ماستفادش من الدرس اللي حصل مع جده ... و انتهت مرحلة الذهب في التمثال و بدأت مرحلة الفضة

- **الملك ده كان ملك ماجن و مستهزئ** و مش عايز يعرف الحق، عشان كده ربنا لم يعطيه فرص كثير لأنه لن يستفيد منها ... و دانيال ابتعد عن الصورة تماماً لأنه كان رافض التعامل مع الملك المستهتر ده
- **في الوقت ده كانت بابل ضعفت** و بدأت الممالك اللي حواليتها (مادي و فارس) تحاصرها ... لكن الملك كان غرقان في الولايم و شرب الخمر
- في أحد الولايم دي، أمر إن آنية الخدمة الخاصة بالهيكل (اللي جابها نبوخذنصر) يجيبوها و يشربوا فيها خمر! **هو كان عارف إن الآنية دي مستخدمة في العبادة** ... يعني كان بيستهزئ بربنا ... شرب الخمر آخره كده
- **ربنا بعت أصابع ملاك بس بكتابة قدام الملك** ... كتابة أرعبته و ماعرفش يفسرها ... جاب الحكماء بتووعه و ماعرفوش ... الملكة والدته قال له يجيب دانيال

- شتان بين احترام دانيال في التعامل مع نبوخذنصر و شدّته في الكلام مع الملك المستهتر ده ... دانيال فسّر له الكتابة اللي بتقول **إن ملكه انتهى و إنه هايهلك** ... الملك بعد كل اللي سمعه برضه ماتابش و فضل متكبر ... و فعلاً ليلتها مات و صار الملك لمملكة فارس ... و كورش ملك فارس ولى داريوس ملك مادي على بابل

فالآن، أنا نبوخذنصر، أسبّح و أعظم و أحقد ملك السماء، الذي كل أعماله حق و طّرقه عدل، و من يسلك بالكبرياء فهو قادر على أن يذلّه.

دانيال 4 : 37

درس قاسي و لكن فسّتح ربنا أعطاه لنبوخذنصر بسبب كبريائه ... و نبوخذنصر استفاد من الدرس بالتوبة و الإيمان إن ربنا هو صاحب القدرة

تقيل، وُزنت بالموازين فوجدت ناقصاً.

دانيال 5 : 27


جملة مرعبة جداً إن ده يبقى كُلم ربنا النهائي ... نهاية أكيدة لكل واحد مستهتر و مستهين بربنا و رافض يتواضع قدامه رغم اللي شافه

نتعلّم إيه؟

ربنا بيدّي فُرس توبة لكل ... نبوخذنصر كان عنده التواضع و الحكمة و تاب و سبّح ربنا، بينما حفيده لم يتّعظ من الحكاية دي بل زاد في الكبرياء .. فهلك

🙏 يا رب نبّه قلبي و صخّيه من الغفلة اللي هو فيها ... خليني أقف أمامك بتواضع و خشوع قبل ما يبجي وقت يتقفل فيه باب التوبة

5: دانيال في جب الأسود



- رجع دانيال في الصورة ثاني في عهد الملك داريوس ... كان ساعتها كبير في السن (حوالي 70 سنة) ... **داريوس خلّى دانيال زي النائب بتاعه**
- الحاقدين على نجاح دانيال كانوا كثير ... و مالقوش غلطة عليه من أمانته ... لجئوا لخدعة غريبة و **تملقوا الملك يطلع أمر إن ماحدّش يطلب حاجة من أي إله (غير الملك في نظرهم) لمدة شهر ...** تملّق غريب جداً، للأسف صادف هوى و كبرياء في نفس الملك
- دانيال أكيد كان فاهم إن الكلام متفضّل عليه ... لكن مافيش حاجة تعطل لقاءه بإلهه: **ينبغي أن يُطاع الله أكثر من الناس ...** كمل صلاته عادي و هو فاتح شبّاكه و باصص على أورشليم
- اصطاده أعداءه و قالوا للملك اللي فهم الخدعة لكن ماعرفش يرجع في كلامه و **اضطر يرمي دانيال في جب الأسود** (حفرة عميقة مسدودة بحجر من فوق ... جواها أسود جعانة بقالها كثير)

• ثاني يوم جه الملك عند الجب ينادي على دانيال بيأس ... لقاها حي و ربنا أنقذه بإنه سدّ أفواه الأسود ... و:

- خرج دانيال من الجُب رمز لقيامة ربنا يسوع
- لم يكن للأسود قوة على دانيال زي ما ربنا يسوع غلب الموت
- زيارة الملك له كانت زي زيارة المريمات للقبر
- هلاك أعداءه (الملك أمر إن المتآمرين يترموها في الجب، و في الحال افترستهم الأسود) كانت زي هزيمة الشيطان

نقدر نشوف ملخص الإصحاح ده في الكارتون ده

فقال هؤلاء الرجال: «لا نَجِدُ على دانيال هذا عِلَّةَ إلا أن نجدها من جهة شريعة إلهه»

دانيال 6 : 5

ما أجمل ولاد ربنا الأمناء اللي أعدائهم مايقدروش يجدوا ليهم غلطة سواء من ناحية الأمانة في الشغل أو في السلوك ... و يشهدوا بأمانتهم كمان من جهة ربنا

نتعلّم إيه؟

في الآخر عظم داريوس إله دانيال زي ما نبوخذنصر عظم إله ال3 فتية لما ربنا أنقذهم من الآتون ... موقف ثاني يبان مستحيل، لكن ربنا يتمجد فيه بفضل أمانة أولاده

🙏 يا رب خلي عندنا أولويات صح و أمانة للنهاية ناحيتك زي دانيال و ال3 فتية

6: رؤيتين لدانيال: تعاقب الممالك

إصحاح 7 و 8



الرؤيا الأولى: 4 حيوانات و 4 ممالك

إصحاح 7


• دانيال شاف 4 حيوانات:

1. الأسد المجنّح = شعار مملكة بابل ... و ملكها نبوخذنصر
2. الدب = مملكة مادي و فارس، و وقوفه على ناحية واحدة يشير لمملكة فارس اللي انتصرت على مادي و بقت مملكة واحدة
3. النمر = الإسكندر الأكبر اللي انتصر على فارس ... و بعده انقسمت المملكة على 4 قواد (ال4 أجنحة) و كل قائد له منطقة
4. الحيوان الرابع = السلوقيين اللي ملكوا على إسرائيل
5. القرن الصغير = أنطيوخس أبيفانيوس الملك المجنّح اللي انتصر على 3 ملوك قبله ... و في فترة ملكه اضطهد اليهود و نجس الهيكل و منع الذبيحة 3 سنين و نصف حتّى طهره المكابيين (مكابيين أول 4)

• بعد كده دانيال شاف دينونة القرن الصغير المجنّح ... و شاف اين الإنسان المتجسّد ... و قرّبوه إلى العتيق الأيام (الله الآب) = ذبيحة الصليب

• و ربنا يسوع و مملكته (كنيسة العهد الجديد) فلكه لن ينتهي

الرؤيا دي شافها دانيال في عهد بيلشاصر... ساعتها كان متفرّغ للخلوة و الصوم و الصلاة ... و دي شبه جداً حلم التمثال بتاع نبوخذنصر



تفسير الرؤيا الأولى لدانيال - كتاب (دانيال الرجل المحبوب)


الرؤيا الثانية: الكبش و التيس (فارس و اليونان)

إصحاح 8

الرؤيا دي بعد الأولى بسنتين و قبل سقوط بابل ب 10 سنوات ... هي نفس الرؤيا اللي فاتت تقريباً

- دانيال شاف كبش ذو قرنين (فارس و مادي) يكبر و يتعاضم و يغلب ... بعد كده يتفوق عليه تيس (اليونان) له قرن قوي (الإسكندر الأكبر) ... بعد كده طلع منه 4 قرون (4 قواد و 4 ممالك) ... بعد كده القرن الصغير (أنطيوخس) اللي اضطهد اليهود و قتل رئيس الكهنة و نجس الهيكل و أوقف الذبيحة

- اليهود توقفت عبادتهم مع أنطيوخس أبيفانيوس لمدة 6 سنين ثم ثار المكابيون عليه ... و ربنا ضرب أنطيوخس بمرض و مات به ... و يهوذا المكابي دخل أورشليم و طهر الهيكل و أصبح التذكار ده عيد عند اليهود (عيد التجديد)
نقدر نعرف أكثر في [ملخص سفر المكابيين](#)



تفسير الرؤيا الثانية لدانيال - كتاب (دانيال الرجل المحبوب)

**كُنْتُ أَرَى فِي رُؤْيٍ اللَّيْلِ وَ إِذَا مَعَ سُحُبِ السَّمَاءِ مِثْلُ ابْنِ إِنْسَانٍ أَتَى وَ جَاءَ إِلَى الْقَدِيمِ
الْأَيَّامِ، فَقَرَّبُوهُ قَدَامَهُ. فَأُعْطِيَ سُلْطَانًا وَ مَجْدًا وَ مَلَكُوتًا لَتَتَعَبَّدَ لَهُ كُلُّ الشُّعُوبِ وَ
الْأُمَمِ وَ الْأَلْسِنَةِ. سُلْطَانُهُ سُلْطَانُ أَبَدِي مَا لَنْ يَزُولَ، وَ مَلَكُوتُهُ مَا لَا يَنْقَرُضُ.**

دانيال 7 : 13 و 14

دانيال الرجل المحبوب ... شاف السيد المسيح بنفسه و شاف الصليب


نتعلّم إِيَّه؟

سِر الرب لأتقيائه ... ربنا أعلن لدانيال المستقبل (زي ما عمل مع إبراهيم و موسى و غيرهم)
... و دانيال شاف المسيح بنفسه

🙏 يا رب خليني أكون قريب لك زي ولادك كده ... ساعتها مش هيشغلني أي قلق على
المستقبل لأنني واثق في صانع الخيرات


7: صلاة دانيال و الرؤيا الثالثة

إصحاح 9



- دانيال بروح الصلاة قرأ **نبوة إرميا (إرميا 25)** و عرف إن معناها إن السبي 70 سنة و بعدها وقت الرجوع لأورشليم
- **صلّى صلاة رائعة** (برضه بنقراها في سبت النور) بدأت بالاعتراف بخطيته و خطية الشعب و ليس الشكوى (رغم إنه فعلاً ماعملش حاجة) ... و بعدها طلب رحمة ربنا
- ربنا أرسل له الملاك جبرائيل بيؤكد له صحة فهمه و قرب العودة من السبي ... و لكن فيه موعد أهم بكثير هايحصل بعد كده بكثير: **مجيء السيد المسيح** بعد العودة من السبي (ال70 أسبوع بين العودة من السبي لمجيء السيد المسيح = $7 \times 70 = 490$ سنة)

ملخص الرؤيا الثالثة (السبعون أسبوعاً)



تفسير الرؤيا الثالثة لدانيال - كتاب (دانيال الرجل المحبوب)

الإصحاح ده حصل في السنة الأولى لملك داريوس الملك المادي على بابل

يا سيّد اسمع. يا سيّد اغفر. يا سيّد أصغ و اصنع. لا تؤخّر من أجل نفسك يا إلهي، لأن
اسمك دُعِيَ على مدينتك و على شعبك

دانيال 9 : 19

صلاة دانيال مثال رائع في الصلاة: بدأ بذكر صفات ربنا عشان يعرف إنه بيكلم الإله المخوف القوي ... بعد كده اعتراف بخطايا إسرائيل كشعب دانيال، و استحقاق إسرائيل لعقاب ربنا ... بعد كده

رجاء في رحمة ربنا من أجل اسمه القدوس


نتعلّم إِيَّه؟

الصلاة اللي زي صلاة دانيال دي ربنا دائماً بيدّي صاحبها أكثر ما هو عايز بكتير جداً ... دانيال مش بس عرف إن الشعب هيرجع من السبي، ده كمان عرف وقت مجيء السيد المسيح

🙏 يا رب إديني التواضع و القرب منك ... أتعلم أصلي لك زي ما القديسين بيصلّوا

8: الرؤيا الرابعة: الرب يسوع في مجده


إصحاح 10 ل 12



الرؤيا دي بعد سنتين من بداية العودة من السبي ... دانيال كان كبر جداً في السن (80 سنة) و كان بيصوم و يصلي بدموع 3 أسابيع لأن فيه يهود فضلوا الاستمرار في بابل على العودة لأورشليم

- دانيال شاف السيد المسيح (شبه اللي وصفه القديس يوحنا في سفر الرؤيا) ... و كلمه الملاك جبرائيل
- إصاح 11 نبوة طويلة عن الحرب بين البطالمة (مملكة الجنوب و كانت تحكم مصر) و السلوقيين (مملكة الشمال و كانت تحكم إسرائيل و سوريا) بعد موت الإسكندر الأكبر
- و زي ما قرينا من الإصحاحات اللي فاتت، ملك السلوقيين (أنطيوخس) دّس الهيكل و اضطهد اليهود اضطهاد عنيف جداً ... زي الدجال في الأيام الأخيرة

- إصاح 12 عن آخر الأزمنة (الاضطهاد و الدجال) و الدينونة و اليوم الأخير ... اللي فيه الأبرار بضيئون كالشمس



تفسير الرؤيا الأخيرة لدانيال - كتاب (دانيال الرجل المحبوب)

دانيال عيده يوم 1 أبريل (23 برمهات) ... بركة صلاته تكون معنا آمين

و قال: «لا تَخَفْ أيها الرجل المحبوب. سلامٌ لك. تشدّد. تقوّ». و لَمَّا كَلَّمَنِي تَقَوَّيْتُ و قُلْتُ: «ليتكلم سيدي لأنك قوّيتني».

دانيال 10 : 19

ما أجملك يا دانيال ... صديق الملائكة اللي جه الملاك و قواه و قال له: الرجل المحبوب



و الفاهمون يضيئون كضياء الجَلَد، و الذين رَدّوا كثيرين إلى البرِّ كالكوكب إلى أبد الدهور

دانيال 12 : 3

الأبدية السعيدة هي المكافئة التي وعد بها ربنا كل أولاده المتمسكين به



نتعلّم إيه؟

في الآخر مهما طالت التجارب و الضيقات، الله هو ضابط الكل محب البشر الصالح التي بيدبر الخير لأولاده

🙏 يا رب خلي إيماني و رجائي فيك ثابتين عشان وقت التجارب أثبت فيك



المراجع 📖

- TheBibleProject
- برنامج فتشوا الكتب (أبونا داود لمعي)
- كتاب (دانيال الرجل المحبوب) – أبونا داود لمعي و د. ليليان ألفي و د. هاني صبحي
- تنمة سفر دانيال من موقع St. Takla